



Terenga 4: Hōtaka 29 - hiahia...kia / ki te...

He Mihi

Kei ngā muranga ahi o ngā tūpuna kua riro, nau mai anō ki te hōtaka whakapakari i ngā pūkenga whakapuaki i te whakaaro Māori mā roto mai i te kōrero.

Hei Mahi Whakarongo

Ko te kiriata poto kua tīpakohia i te rā nei, i ahu mai i te hōtaka o Whakataukī. Ko Mauriora Kīngi te kaikōrero. E hoki ana ngā mahara ki ngā kōrero tuku iho. Anei ngā pātai hei whakautu mā koutou:

- 1) He aha te tikanga o te kōrero 'He whatitiri ki te rangi, ko Te Arawa ki te whenua'?
- 2) He aha te iwi i hiahia ai ki te whakahoki mai i te upoko o Te Hurinui?
- 3) He aha te roanga o te kōrero hei whakataki i te kōrero i roto i te pātai tuatahi?

He Whakamārama

Hei whai i te kupu 'hiahia' me ōna momo rerekē, arā te 'pīrangi', te 'tōmina', te aha atu rānei, ka whakamahia te pū 'kia', ngā pū 'ki te' rānei hei whakataki i te mahi, i te āhua rānei e hiahia ana te tangata ki te whai atu i te mea rānei e hiahia ana.

1. E hiahia ana au **ki te haere** ki tāwāhi. (kia x)
Whakamahia te 'ki te' mena he **mahi** te aronga o te hiahia, ā, **kotahi te kaimahi**.
2. E hiahia ana au **kia haere koe** ki waho. (ki te x)
Whakamahia te 'kia' mena he **he rerekē te kaimahi** i te wāhanga tuarua o te rerenga.
3. E hiahia ana au **kia kitea** e aku tamariki ētehi whenua rerekē. (ki te x)
Whakamahia te 'kia' mena he **tūmahi hāngū** kei te wāhanga tuarua o te rerenga.
4. E hiahia ana au **kia ora** te reo i aku uri. (ki te x)
Whakamahia te 'kia' mena he **tūāhua** kei te wāhanga tuarua o te rerenga.
5. E hiahia ana ia **ki te kite** i tana hoa. E hiahia ana ia **kia kite** i tana hoa.
Whakamahia te 'kia', te 'ki te' rānei mena ko te kupu 'kite' tonu te aronga o te hiahia.

Hei Mahi

Whakaurua ngā pū tika ki ngā āputa i roto i ngā rerenga nei:

1. Kei te pīrangi taku rangatira _____ noho roa au ki te mahi ā te Pōmere.
2. Kua roa taku tāne e hiahia ana _____ whāngai i tētehi mokopuna.
3. E hiahia ana au _____ whakaakona aku tamariki e ngā tohunga pāngarau.
4. Kāore rātou i te hiahia _____ kite i te kanohi o te nanakia.
5. Ki te kore koutou e pīrangi _____ mate te reo, tēnā kōrerotia!

Whakautu:

1. kia
2. ki te
3. kia
4. kia / ki te
5. kia